

Well büst du?

VAN ELKE RENKEN
UT MARX



ELKE
RENKEN

Vörmiddags üm elf Ühr in d' Inkoopsladen. Sandra steiht mit Mask un Inkoopswagen bi d' Appels un överleggt, welke Soort se nehmen sall, as en öllern Mann up hör anstüürt. „Moin!“, röppt he Sandra tomööt, „wi hebbt uns ja al lang nich mehr sehn.“ Sandra kickt sük üm, aver achter hör is nüms. De Mann meent hör. „Moin“, antert se un sinneert noch daaröver na, well hör daar so fründlich begrött, as he al wieder snackt. „Wo geiht 't denn? Sünd ji noch all gesund?“ „Uns geiht dat good. Un wo is dat bi jo?“, fraggt Sandra nu. Irgendwat mööt se ja woll seggen. „Ja, dat geiht woll. Ik bün ja blied, dat mien Christa wedder ut 't Krankenhuus rut is. Du weetst ja, dat se an d' Gall opereert worden is, un wi drüffen hör ja wegen Corona bold nich besöken. Mooi weer dat nich. För hör nich un för uns ok nich. Aver nu is se ja wedder to Huus.“

Christa? Wat för 'n Christa? Sandra överleggt, wat se för Christas kennt. Aver de hör Mannlüü segen all anners ut. „Aver allens is good aflopen?“, will Sandra nu weten. De Mann zuppelt sien Mask torecht, de

hüm en beten van d' Nöös afrutscht is. „Pien hett se woll noch, aver dat is normaal“, seggt de Dokters. „Se dröfft aver noch nix böhren. Karina kummt woll maal na Fieravend un kickt, af se wat helpen kann.“

Karina? Well is denn nu wedder Karina? Woll sien Tochter. Sandra fallt van hör Bekannten

nüms in, de Karina heet. Dat gifft dat doch nich! Well is de Mann denn blot? „Ik glööv, ik mööt wieder“, höört se sük nu seggen, „Andy luurt seker al up mi.“ „Och, hebbt ji 'n Hund kregen? Dat hett een al faken hört: Wenn d' Kinner ut 't Huus sünd, word en Hund anschafft.“

Kinner! Se hett doch överhoopt kien Kinner. Un Andy is ok kien Hund, man hör Keerl. De Mann schient hör wegen de Mask mit en annern Froom to verwesseln. Daarüm kennt se hüm nich. Aver dat mag Sandra hüm nu ok nich mehr seggen. Se hett dat nu tomaal leep ielig. „Deit mi leed, ik mööt wieder“, seggt se, packt fell en paar Appels in hör Inkoopswagen un lett de Mann stahn. „Grööt Michael van mi“, röppt de hör noch na. „Maak ik“, röppt Sandra torügg, ok wenn se natürelk ok nich weet, well Michael is.